



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO



Datë: 30.05.2025
Numër Protokolli: 3670/2025

A.nr.699/2025

Këshilli i Pavarur Mbikëqyrës për Shërbimin Civil të Kosovës–Kolegji për Shqyrtimin dhe Vendosjen e Ankesave në përbërje nga: Arben Mehmeti-kryetar, Malsore Gashi Bajraktari dhe Eshref Shabani, anëtarë, me Flakron Gashi- në cilësinë e procesmbajtësit ka shqyrtuar ankesën A.nr.699/2025, të datës 23.04.2025, të parashtruar nga ankuesja L.B., kundër Njoftimit të datës 18.04.2025 të Njesisë së Burimeve Njerëzore të Komunës së Gjakovës, në çështjen juridike “*Kontestim konkursi*”, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.7 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, si dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 30.05.2025 mori:

V E N D I M

Hedhet poshtë si e palejuar ankesa A.nr.699/2025, e datës 23.04.2025 e parashtruar nga ankuesja L.B.

A r s y e t i m

Kandidatja për pranim në shërbimin civil, L.B (në tekstin e mëtejme referuar: Ankuesja), me datë 18.04.2025 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, e cila është regjistruar me numër protokolli 2681/2025 nën shenjën A.nr.699/2025, kundër Njoftimit të datës 18.04.2025 të Njesisë së Burimeve Njerëzore të Komunës së Gjakovës.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Këshilli) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datën 28.04.2025 ka proceduar kërkesën për përgjigje në ankesë tek Komuna e Gjakovës, ndërsa kjo e fundit me datë 05.05.2025, ka dorëzuar përgjigjen në ankesë lidhur me procedurën në fjalë.

Kolegji për Shqyrtimin dhe Vendosjen e Ankesave (në tekstin e mëtejshëm referuar: Kolegji i Këshillit) për vendosje meritore administroi këto prova: Ankesën të datës 18.04.2025 të parashtruar nga ankuesi në KPMSHCK; Njoftimin e datës 18.04.2025 të Njesisë së Burimeve Njerëzore të Komunës së Gjakovës; Kopjen e letërnjoftimit të ankueses; Kërkesë për përgjigje në ankesë e datës 28.04.2025; Përgjigje në kërkesë e datës 28.04.2025; konkursin e datës 14.03.2025; Vendimin e datës 14.03.2025 për themelimin e Komisionit të Pranimit; Aplikacionin e ankueses të datës 01.04.2025 me dokumentacionin e bashkangjitur me rastin e aplikimit; Listën e aplikantëve në procedurë; Njoftimin e datës 18.04.2025 për refuzimi e aplikacionit të ankueses; Njoftimin e datës 18.04.2025 për verifikimin paraprak; Formularët e datës 25.04.2025 për vlerësim të eses për kandidatët në procedurë; Njoftimin e datës 25.04.2025; Formularët e intervistimit të intervistës me gojë e datës 28.04.2025; Formulari i renditjes përfundimtare i datës 28.04.2025; Njoftimi për kandidatët e suksesshëm i datës 28.04.2025;

Kolegji i Këshillit, pas analizimit të shkresave të lëndës të parashtruara nga palët, ka konstatuar se ankesa e ankuesit në këtë fazë **është e palejuar, sepse:**

Kolegji i Këshillit nga administrimi i shkresave të lëndës ka konstatuar se Komuna e Gjakovës, më datë 14.03.2025 ka shpallë konkursin me numër Reference RN00017116, për Grupi i arsimit, pozita e punës *“Zyrtar i lartë për cilësi në arsim”*, Drejtoria për Arsim në Komunën e Gjakovës, ku afati për aplikim ka qenë nga data 15.03.2025 deri më 13.04.2025, ndërsa nga shkresat e këndës arrihet në konstatimin se edhe ankuesja ka aplikuar në këtë konkurs.

Tutje, nga shkresat e lëndës rezulton se ankuesja, nuk e ka kaluar fazën e verifikimit paraprak, pasi që Njësia e Burimeve Njerëzore e Komunës së Gjakovës, përmes Njoftimit të datës 18.04.2025 i ka refuzuar aplikacionin me arsyetimin se e njëjta nuk plotëson kriteret e përgjithshme të konkursit respektivisht, ndërlidhur me përvojën e punës profesionale prej dy (2) vitesh. Tutje, akti kontestuar përmbante udhëzimin në mjete juridike apo këshillën juridike, si në vijim: *“ Kandidati i pakënaqur me procesin e rekrutimit, pas shpalljes së rezultateve përfundimtare kanë të drejtë ankese në KPMSHCK sipas afatit të përcaktuar në ligjin përkatës për procedurën administrative”*.

Ankuesja në ankesën e parashtruar në Këshill, pretendon se i është refuzuar aplikacioni në mënyrë të kundërligjshëm për procedurën e rekrutimit sipas konkursit RN00017116 të datës 14.03.2025, pasi që i kam plotësuar kriteret e nevojshme, me arsyetimin se kandidatëve të tjerë në procedurë ia kanë njohur të njëjtën përvojë të punës.

Kolegji i Këshillit lidhur me këtë çështje juridike administrative, sa i përket procedurave të pranimit lidhur me pranueshmërinë e ankesës së ankueses mori për bazë dispozitat e nenit 27 Paragrafi 4 të Ligjit nr.08/L-197 për Zyrtarët Publik , i cili përcakton se: *“4. E drejta e ankimit në KPMSHCK i njihet edhe çdo kandidatje/i në procedurë pranimi në shërbimin civil”*, si rrjedhojë meqenëse ankuesja konteston procedurën e rekrutimit që ndërlidhet me fazën e verifikimit paraprak, atëherë Kolegji i Këshilli konstaton se mënyra e parashtrimit të ankesës lidhur me procedurat e pranimit në Shërbimin Civil është rregulluar me nenin 44 paragrafi 10 të Ligjit nr.08/L-197 për Zyrtarët Publik i cili përcakton se: *“10. Kandidatet/ët e pakënaqur me procesin e rekrutimit, pas shpalljes së rezultateve përfundimtare kanë të drejtë ankese në KPMSHCK sipas afatit të përcaktuar në ligjin përkatës për procedurën administrative.”*, dhe me nenin 17 Rregullore Nr. 15/2023 për Procedurën e Pranimit Në Shërbimin Civil, është përcaktuar se:

“Kandidatët e pakënaqur me procesin e rekrutimit, pas shpalljes së rezultateve përfundimtare kanë të drejtë ankese në KPMSHCK në afat prej tridhjetë (30) ditëve”.

Kolegji i Këshillit duke marrë parasysh provat e lëndës si dhe duke ju referuara dispozitave të cekura si më lartë konstaton se ankuesja ankesën e datës 23.04.2025 në Këshillin e Pavarur Mbikëqyrës për Shërbim Civil e ka parashtruar para shpalljes së rezultateve përfundimtare, gjegjësisht Kolegji konstaton se meqë procedura e ankimit ndaj procedurës së pranimit është parashikuar sipas dispozitave të Ligjit Nr.08/L-197 për Zyrtarët Publik dhe Rregullores (QRK) nr. 15/2023 për Procedurën e Pranimit në Shërbimin Civil, atëherë ankesa e parashtruar para shpalljes së rezultateve përfundimtare është në kundërshtim me nenin 129 paragrafi 1 nën paragrafi 1.4 të Ligjit Nr.05/L-031 për Procedurën e Përgjithshme Administrative, ngase refuzimi i aplikacionit të ankueses nuk nënkupton shpalljen e rezultateve përfundimtare në kuptim të nenit 17 të Rregullores Nr. 15/2023 për Procedurën e Pranimit në Shërbimin Civil, pasi që procedura e rekrutimit në rastin e konkursit ndaj të cilit ankuesja ka parashtruar ankesë ende nuk kishte përfunduar në kuptim të nenit 44 paragrafi 10 të Ligjit nr.08/L-197 për Zyrtarët Publik, gjegjësisht të paktën deri me datë 28.04.2025 sipas përgjigjes së dhënë nga Njësia e Burimeve Njerëzore, si dhe konstatimit edhe në sistemin online të rekrutimit konkursi.org-gov.net.

Bazuar si më sipër si dhe duke ju referuar provave të lëndës Kolegji i Këshillit konstaton se ankesa e ankuesit e datës 20.03.2025 e parashtruar në Këshillin e Pavarur Mbikëqyrës për Shërbim Civil, është e pajueshme në kuptim të nenit 129 paragrafi 1 nënparagrafi 1.4 të Ligjit nr.05/L-031 për Procedurën e Përgjithshme Administrative sepse e njëjta është parashtruar në fazat fillestare të procedurës së rekrutimit gjatë të cilave ligji material nuk e ka përcaktuar të drejtën e ankesës në KPMSHCK.

Vendim hyn në fuqi në ditën e nënshkrimit nga Kryetari i Kolegjit.

Këshillë juridike: Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij Vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda, A.nr.699/2025, datë 30/05/2025.

Flakron GASHI

Procesmbajtës

Arben MEHMETI

Kryetar i Kolegjit

Vendimi i dorëzohet:

- Ankueses L.B;
- Komunës së Gjakovës (Udhëheqësit të Burimeve Njerëzore), si dhe
- Arkivit të KPMSHCK-së.